

दिनांक 30.07.2024
समय: 18.45 बजे

आकाशवाणी जयपुर—अजमेर

प्रादेशिक समाचार

- राज्य रा मनोनीत राज्यपाल हरिभाऊ किसनराव बागडे आज जयपुर पधार्या—मुख्यमंत्री भजनलाल शर्मा अर विधानसभा अध्यक्ष वासुदेव देवनानी बागडे री आवभगत कीनी ।
- कृषि मंत्री शिवराज सिंह चौहान कह्यो—सरकार सरकारी मोल माथे साखां री खरीदी रो फायदो किसाना ताई पूगावणो तैय कीनो ।
- पेरिस ओलंपिक री दस मीटर एयर पिस्टल मिक्स्ट निशानेबाजी होड़ मांय मनु भाकर अर सरबजोत सिंह री जोड़ी कांसा रो तमगो जीत्यो ।

अर

- डूंगरपुर जिला मांय चांदीपुरा वायरस रा मरीज री ठा पड्यां पाछे चिकित्सा अर स्वास्थ्य विभाग विगतवार एडवाइजरी जारी कीनी ।

000

राज्य रा मनोनीत राज्यपाल हरिभाऊ किसनराव बागडे आज सरकारी हवाई जहाज ऊं जयपुर पधार्या । हवाई अड्डा माथे मुख्यमंत्री भजनलाल शर्मा अर विधानसभा अध्यक्ष वासुदेव देवनानी वां री अगवानी कीनी । ई मौके उप मुख्यमंत्री डॉ. प्रेमचंद बैरवा अर मंत्री मण्डल रा दूजा सदस्य, मुख्य सचिव सुधांशु पंत, पुलिस महानिदेशक यू.आर. साहू अर प्रशासन अर पुलिस रा आला अहलकार ई मौजूद रह्या । मुख्यमंत्री भजनलाल शर्मा मनोनीत राज्यपाल बागडे रो मंत्रीपरिषद रा सदस्यां सागे परिचय करायो । मनोनीत राज्यपाल ने हवाई अड्डा माथे आरएसी री बटालियन री ओर ऊं गार्ड ऑफ ऑनर दियो ज्यो । मनोनीत राज्यपाल बागडे परेड री सलामी लीनी अर सम्मान गारद रो निरीक्षण कीनो । ई पाछे मनोनीत राज्यपाल राजभवन पधार्या जठे वां रो गार्ड ऑफ ऑनर दे र स्वागत करी ज्यो । बागडे राजभवन मांय सब ऊं पैली राज राजेश्वर मिंदर मांय जल चढ़ा र भगवान शंकर ने बिल्व पत्र अर प्रसाद अर्पण कर र पूजा अर्चना कीनी अर सगळां सारू मंगल कामना कीनी । मनोनीत राज्यपाल मौजूदा राज्यपाल कलराज मिश्र सागे ई मुलाकात कीनी ।

राज्य रा हर विधानसभा हलका मांय 5 नुवा आंगनबाड़ी केंद्र खोल्या जावेला। महिला अर बाल विकास मंत्री दिया कुमारी आज विधानसभा मांय बतायो के आंगनबाड़ी केन्द्रां रा भवन बणावण रो काम, पंचायतीराज, स्थानीय निकाय अर राजस्व विभाग ऊं मुफ्त जमीं आवंटन व्हेवण परां माली साधनां री उपलब्धता रा आधार ऊं कर्यो जावे है। दिया कुमारी प्रश्नकाल रे दौरान पूछी ज्या पूरक सवालां रा जवाब मांय आ जाणकारी दीनी।

000

गौपालन मंत्री जोराराम कुमावत आज विधानसभा मांय कह्यो के ई साल पेश करी ज्या बजट मांय गौवंश ने बचावण अर वां ने बधावो देवण सारू पंजीकृत गौशालावां ने दिया जावण वाळा अनुदान मांय 10 फीसदी बधोतरी करण रो ऐलाण करी ज्यो है। वे प्रश्नकाल रे दौरान सदस्यां कानी ऊं पूछी ज्या पूरक सवालां रा जवाब मांय आ जाणकारी दीनी। वे कह्यो के प्रदेश मांय न्यारी-न्यारी योजनावां रे मार्फत ढांढां रा अस्पतालां मांय मुफ्त जांच, ईलाज अर दवाइयां मुहैया कराया जा रह्या है। वे बतायो के ढांढां राखण वाळां ने मुफ्त सिखावण दी जा रही है अर किसान क्रेडिट कार्ड रे मार्फत कर्ज लेवण परां ब्याज माथे सब्सिडी दी जा रही है।

000

विधानसभा मांय लारला दिनां नगरीय विकास रा कटौती प्रस्ताव री चर्चा रे दौरान अपशब्द बोलण रा मामला मांय विधानसभा अध्यक्ष वासुदेव देवनानी कांग्रेस रा विधायक शांति धारीवाल ने करडी चेतावनी देता थकां वां रे दो दिन ताईं सदन री कार्यवाही मांय सिरकत करण माथे रोक लगा दीनी है। हालांकि धारीवाल सदन मांय मौजूद रह सकेला। आज सत्ता पख रा सदस्यां कानी ऊं ओ मुद्दो उठावण परां स्पीकर दोन्यू पखां रा सदस्यां ने ई मुद्दा माथे बोलण रो मौको दीनो। स्पीकर देवनानी कह्यो के विधानसभा री मर्यादा बणायी राखणो वां रो दायित्व है अर सदस्यां कानी ऊं कही ज्या शब्द सदन अर लोकतंत्र सारू शर्मनाक अर चिंता करण लायक है। मामला मांय धारीवाल ई गलती मानता थकां वां रा शब्दां सारू माफी मांगी। धारीवाल कह्यो के वां रो इरादो किण ई ने नीचा दिखावण रो नी हो।

000

कृषि अर किसान कल्याण मंत्री शिवराज सिंह चौहान कह्यो है के सरकार सरकारी मोल माथे साखां री खरीदी रो फायदो देश रा किसानां ताईं पूगावणो तैय कीनो है। वे आज लोकसभा मांय कह्यो के किसानां ऊं सरकारी मोल माथे साखां री खरीदी करण अर इण ने और असरदार बणावण रा बारा मांय राय देवण सारू सरकार एक समिति बणायी है।

000

पेरिस ओलंपिक मांय भारत आज दूजो तमगो जीत्यो। 10 मीटर एयर पिस्टल मिश्रित टीम होड़ मांय मनु भाकर अर सरबजोत सिंह री जोड़ी कांसा रो तमगो जीत्यो। मनु अर सरबजोत सिंह री जोड़ी दक्षिण कोरिया रा ओह ये जिन अर ली वोन्हो री जोड़ी ने 16-10 रा अंतर ऊं हरा र कांसा रो तमगो जीत्यो। ई सागे ई भारत पेरिस ओलंपिक मांय कांसा रा दो तमगा जीत लीना है। इण ऊं पैली दीतवार ने मनु भाकर महिलावां री 10 मीटर एयर पिस्टल होड़ मांय कांसा रो तमगो जीत्यो हो, जो ई

ओलंपिक होड़ मांय भारत रो पहलो तमगो हो। इण ऊं पैली बेडमिंटन खिलाड़ी पी.वी. सिंधु अर पहलवान सुशील कुमार ई न्यारा-न्यारा ओलंपिक खेलां मांय दो तमगा जीत सक्या है। राष्ट्रपति द्रौपदी मुर्मू कांसा रो तमगो जीतण परां मनु भाकर अर सरबजोत सिंह ने बधाई देता थकां सोशल मीडिया पोस्ट मांय कह्यो के मनु भाकर एक ही ओलंपिक मांय दो तमगा जीत र इतिहास रच दीनो है। प्रधानमंत्री नरेंद्र मोदी ई मनु भाकर अर सरबजोत सिंह ने बधाई दीनी है। सोशल मीडिया पोस्ट रे जरिये प्रधानमंत्री कह्यो के दोन्यू निशानेबाज़ शानदार कौशल अर टीम भावना रो दरसाव कीनो। वे कह्यो के मनु सारु ओ लगातार दूजो ओलंपिक तमगो है, जो वां री लगातार उत्कृष्टता अर समर्पण ने बतावे है। मुख्यमंत्री भजनलाल शर्मा जीतण वाळा आं खिलाड़ियां ने शुभकामनावां दीनी है। वां रा संदेश मांय मुख्यमंत्री कह्यो के मनु भाकर भारत सारु एक ही ओलंपिक मांय दो तमगा जीतण वाळी पहली एथलीट बण गयी है अर वां री ई उपलब्धि माथे पूरा देश ने नाज़ है।

000

राज्य रा सूचना प्रौद्योगिकी अर संचार मंत्री कर्नल राज्यवर्धन राठौड़ आज जयपुर रा राजस्थान सेंटर ऑफ एडवांस्ड टेक्नोलॉजी (आर-कैट) परिसर मांय बिहेवियरल लैब, साइबर सुरक्षा सिमुलेशन लैब अर ब्लॉकचेन एक्सपीरियंस सेंटर रो उद्घाटन कीनो। ई मौके विद्यार्थियां सारु नौकरी लागण मांय मदद ई मुहैया करायी ज्यी। ई सागे ही प्रदेश रा 12वीं पास विद्यार्थियां सारु 'अर्ली कैरियर प्रोग्राम' री सरुआत बाबत् एक गैर सरकारी कंपनी सागे करार माथे सही करी ज्यी।

कार्यक्रम पाछे खबरनवीसां सागे बातचीत करता थकां राठौड़ कह्यो के सूचना प्रौद्योगिकी मांय नुवा काम करण रा मामला मांय राजस्थान दूजा राज्यां ऊं आगे है।

000

झालावाड़ पुलिस री साइबर सेल टीम ऑपरेशन एंटी-वायरस रा तहत चोरी व्ह्या या गम्योड़ा 120 मोबाइल फोन बरामद कीना है। आं मोबाइल फोनां रो मोल करीब 24 लाख रुपया मानी ज्यो है। झालावाड़ री एस.पी. रिचा तोमर बतायो के अ मोबाइल फोन राजस्थान अर मध्य प्रदेश ऊं बरामद कर र वां रा मालिका ने सौप दिया ज्या है।

000

गंगापुरसिटी मांय संपूर्णता अभियान रा तहत आज आशान्वित ब्लॉक तलावड़ा मांय मुफ्त स्वास्थ्य जांच शिविर लगायी ज्यो। शिविर मांय 400 ऊं बत्ता लोग-लुगाइयां री शुगर, बी.पी., कैंसर अर गर्भाशय री मुफ्त जांच करी ज्यी। पंचायत समिति री प्रधान मंजू गुर्जर खुद ई शिविर मांय स्वास्थ्य जांच करा र गांव वाळां ने शिविर रो फायदो उठावण बाबत् कह्यो।

000

डूंगरपुर जिला मांय चांदीपुरा वायरस रा एक मरीज़ री ठा पड़्यां पाछे चिकित्सा अर स्वास्थ्य विभाग प्रदेशभर मांय सावचेती राखण अर जरूरी प्रबन्ध करण बाबत् विगतवार एडवाइजरी जारी कीनी है। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह बतायो के ई बीमारी ऊं बचाव अर इण री जद मांय आवण वाळा मरीजां रा

ईलाज सारू व्यवस्थावां चाक-चौबंद करी ज्यी है अर गुजरात ऊं लाग्योड़ा ज़िलां मांय खास सावचेती राखण रा हुकम दिया ज्या है।

निदेशक जनस्वास्थ्य डॉ. रवि प्रकाश माथुर बतायो के आशा, एएनएम अर सीएचओ ने घर-घर जा र जाणकारी करण अर ई बीमारी री शंका वाळा या बीमारी री जद मांय आवण वाळा मरीजां रे आरे-सारे रा घरां मांय बचाव अर काबू करण रा काम करण बाबत् कही ज्यो है।

000

जयपुर मांय राजस्थान प्रदेश कांग्रेस कमेटी मुख्यालय माथे पार्टी रा प्रदेश अध्यक्ष गोविन्द सिंह डोटासरा प्रदेश भर ऊं आया कांग्रेस रा नेतावां, कार्यकर्तावां अर जनता रा नुमाइन्दा सागे मुलाकात कीनी। ई दौरान प्रदेश मांय पीवण रा पाणी री कमी अर जोरदार गर्मी बीचे बिजली री जरूरी पूर्ति करण मांय कथित तौर ऊं नाकाम रेहवण अर कानून-व्यवस्था रा हालात माथे चर्चा करी ज्यी। ई पाछे प्रदेश री मौजूदा भाजपा सरकार रे खिलाफ प्रदर्शन करण रो फैसलो करी ज्यो। कांग्रेस रा महासचिव अर प्रवक्ता स्वर्णिम चतुर्वेदी बतायो के डोटासरा 01 अर 2 अगस्त ने सगळा ज़िला अर ब्लॉक लेवल माथे धरना-प्रदर्शन करण रा हुकम दीना।

000

जोधपुर रा डॉ. सर्वपल्ली राधाकृष्णन राजस्थान आयुर्वेद विश्वविद्यालय री ओर ऊं 1 ऊं 7 अगस्त ताई वर्ल्ड ब्रेस्ट फीडिंग सप्ताह मनायो जावेला। इण रा पोस्टर रो विमोचन कुलपति प्रो. वैद्य प्रदीप कुमार प्रजापति कीनो। ब्रेस्ट फीडिंग सप्ताह री आयोजन सचिव डॉ. रश्मि शर्मा ई सप्ताह रा तैत राख्या जावण वाळा निबंध होड़, पोस्टर होड़, अर जागरूकता शिविर सरीखा कार्यक्रमां री विगतवार जाणकारी दीनी।

000